

U G O V O R

Fond Kantona Sarajevo za zaštitu i održavanje grobalja šehida i poginulih boraca, memorijalnih centara i spomen-obilježja žrtava genocida, ul. Širokac br. 22, Sarajevo, koga zastupa v.d. direktor Suad Zijadić, prof. (u daljem tekstu: Ugovorni organ)

i

«KLESAR» d.o.o., ul. Brezovačka br. 43., Hadžići, Sarajevo, koga zastupa direktor Elbedina Krčalo (u daljem tekstu: Dobavljač)

I PREDMET UGOVORA

Član 1.

Predmet ovog Ugovora je izrada i postavljanje šehidskih nišana, nadgrobnih spomenika i nišana roditeljima šehida i zamjena oštećenih šehidskih nišana na području Kantona Sarajevo. Radovi će se izvršiti prema usvojenom projektnom rješenju.

Član 2.

Radovi će se izvoditi u skladu sa tehničkom dokumentacijom iz člana 1. ovog Ugovora i važećim propisima, standardima i tehničkim normama i pravilima struke. Sastavni dio Ugovora je Ponuda broj: 03-5 od 29.05.2017.godine.

II VRIJEDNOST RADOVA

Član 3.

Netto vrijednost predmeta iz člana 1. ovog Ugovora iznosi	19.080,80 KM
Vrijednost PDV-a iznosi	3.243,74 KM

Ugovorne strane su saglasne da ukupna vrijednost ugovora sa uključenim PDV-om od 17 % iznosi
22.324,54 KM

/ slovima: dvadesetdvijehiljadetristinedvadesetčetirii 54/100KM/

Član 4.

Ugovorne strane su saglasne da na gradskim grobljima temelje za nišane radi KJKP "Pokop" d.o.o., tako da Dobavljač postavlja nišane na već urađene temelje.

Ugovorne strane su saglasne da Ugovorni organ snosi troškove naknade za izdavanje saglasnosti za izvođenje radova na gradskim grobljima, tako da Dobavljač nije dužan finansirati istu.

III NAČIN PLAĆANJA

Član 5.

Ugovorni organ će Dobavljaču uplatiti avans u iznosu od 30% od ugovorene cijene u roku do 30 /trideset/ dana od datuma potpisivanja ugovora, nakon što Dobavljač predoči Ugovornom

organu avansnu fakturu i mjenicu sa mjesečnom izjavom. Avansna isplata će se nadoknaditi oduzimajući proporcionalne iznose od redovnih isplata Dobavljaču, da bi se u punom iznosu nadoknadio do isteka roka za završavanje ugovora.

Plaćanje će se prilagođavati odbijanjem za avansnu situaciju.

Ugovorni organ će plaćati Dobavljaču privremene situacije ovjerene od strane Nadzornog organa u roku od 30 (trideset) dana od datuma prijema ovjerene situacije.

IV MJESTO IZVRŠENJA UGOVORA

Član 6.

Ugovorne strane su saglasne da je mjesto izvođenja radova mezarja u Kantonu Sarajevo.

V ROK

Član 7.

Početak i dinamika radova se utvrđuje u dinamičkom planu izrade nišana, a prema uspostavljenim spiskovima od strane Ugovornog organa.

Rok završetka radova je 60 (šezdeset) dana od dana obostranog potpisivanja ugovora.

Član 8.

Ugovoreni rok se može produžiti samo:

- u slučaju zakašnjenja uvođenja u posao, za onoliko dana koliko je trajalo to zakašnjenje,
- u slučaju više sile, za onoliko dana koliko su trajali razlozi produženja izazvani tom silom.

Član 9.

U slučaju kašnjenja u izvođenju radova, do kojeg je došlo krivicom odabranog ponuđača, isti će platiti ugovornu kaznu, u skladu sa Zakonom o obligacionim odnosima, u iznosu od 1% vrijednosti ugovora, za svaki dan kašnjenja do urednog ispunjenja, s tim da ukupan iznos ugovorne kazne ne može prijeći 10% od ukupno ugovorene vrijednosti radova, koji su predmet ugovora. Odabrani ponuđač je dužan platiti ugovornu kaznu u roku od 7 (sedam) dana od dana prijema zahtjeva za plaćanje, od Ugovornog organa.

Ugovorni organ neće naplatiti ugovornu kaznu ukoliko je do kašnjenja došlo usljed više sile. Pod višom silom se podrazumijeva slučaj kada ispunjenje obaveze postane nemoguće zbog vanrednih vanjskih događaja, na koje izabrani ponuđač, nije mogao uticati niti ih predvidjeti.

VI OBAVEZE DOBAVLJAČA

Član 10.

Dobavljač se obavezuje da će:

- radove obavljati stručno i kvalitetno i u skladu sa tehničkim opisom radova i dinamičkim planom građenja;
- dostaviti Ugovornom organu atest o kvaliteti kamena;
- obavjestiti Tehničku komisiju Fonda memorijala koja će prekontrolisati kvalitet materijala koji se obrađuje i boju kamena, kao i da li se izvodi u skladu sa projektnom dokumentacijom;
- u slučaju odstupanja od projektne dokumentacije odmah obustaviti radove;
- izvesti sve eventualne naknadne i nepredviđene radove;

- naknadni i nepredviđeni radovi mogu se izvoditi samo pod uslovom da su prije početka izvođenja radova ugovorene jedinične cijene između ugovornih strana, a što će biti regulisano novim ugovorom;
- nišane raditi od kamena Marmara;
- obavjestiti pismeno Ugovorni organ i pozvati ga da obezbjedi prisustvo svog Nadzornog organa kako bi se izvršio nadzor nad kvalitetom kamena i obrade kamena.

VII OBAVEZE UGOVORNOG ORGANA

Član 11.

Ugovorni organ je obavezan da:

- uvede Dobavljača u posao u roku;
- Dobavljaču preda spiskove za izradu nišana;
- plaćanje ispostavljene situacije izvrši u roku od 15 (petnaest) dana od dana prijema iste;
- preda nacrt idejnog rješenja za izradu nišana kao i tekst i simbol, koji će biti uklesani na svakom nišanu i nadgrobnom spomeniku;
- odgovara za tačnost podataka na nišanu i nadgrobnom spomeniku;
- voditi stručni nadzor nad izvođenjem radova putem Tehničke Komisije Fonda memorijala;
- angažuje Zavod za izgradnju Kantona Sarajevo, koji će vršiti nadzor nad izvođenjem ugovorenih radova.

VIII GARANTNI ROK

Član 12.

Garantni rok za izradu nišana i nadgrobnih spomenika je 2 (dvije) godine.

Ukoliko se u garantnom roku pojave nedostaci u izradi nišana, Dobavljač je dužan na prvi poziv Ugovornog organa otkloniti nedostatke o svom trošku.

Ukoliko se Dobavljač ne odazove na poziv Ugovornog organa za otklanjanje nedostataka, Ugovorni organ ima pravo angažovati drugog dobavljača o trošku Dobavljača iz ugovora.

IX GARANCIJA ZA UREDNO IZVRŠENJE UGOVORA I GARANCIJA ZA KVALITET IZVEDENIH RADOVA

Član 13.

Dobavljač će u roku od 15 /petnaest/ dana, računajući od dana potpisivanja ugovora, dostaviti bezuslovnu bankarsku garanciju za uredno izvršenje ugovora u iznosu od 5% od vrijednosti ugovora sa PDV-om, sa rokom trajanja garancije do potpune realizacije ugovora.

Dobavljač će u roku od 10 /deset/ dana od internog tehničkog prijema radova dostaviti garanciju u vidu mjenice i mjenične izjave u iznosu od 5% od vrijednosti izvedenih radova sa PDV-om za kvalitet izvedenih radova sa rokom trajanja od 2 (dvije) godine plus 30 (trideset) dana.

X NADZOR

Član 14.

Za vršenje cjelokupnog nadzora nad izvođenjem ugovorenih radova Ugovorni organ ovlašćuje: Zavod za izgradnju Kantona Sarajevo.

XI OSTALE ODREDBE

Član 15.

O izvršenim radovima sačinjava se zapisnik, koji ovjerava ovlašteni predstavnik Dobavljača, Ugovornog organa i Nadzornog organa. Zapisnik o izvršenim radovima, predstavlja dokument na temelju kojeg se vrši situiranje izvršenih radova.

Član 16.

Za sve što nije predviđeno ovim Ugovorom primjenjivat će se odredbe Zakona o obligacionim odnosima i posebne uzansi o građenju.

Član 17.

Sve eventualne sporove u vezi sa izvršenjem ovog Ugovora ugovorne strane će rješavati sporazumno.

U slučaju da ugovorne strane ne uspiju riješiti nastali spor, za rješavanje spora stvarno i mjesno nadležan je sud u Sarajevu.


Član 18.

Ugovor je sačinjen u 5 (pet) istovjetnih primjeraka od kojih svaka ugovorna strana zadržava po 2 (dva) primjerka, a 1 (jedan) primjerak ugovora se dostavlja Nadzornom organu.

Član 19.


Ugovor stupa na snagu danom obostranog ovjeravanja i potpisivanja Ugovora od strane ovlaštenih zastupnika ugovornih strana.

ZA UGOVORNI ORGAN
v.d. DIREKTOR
Suad Zijadić, prof.



Broj:13-14-02-220/17
Sarajevo, 19.06.2017.godine

ZA DOBAVLJAČA
DIREKTOR
Krčalo Elbedina



Broj: 4-6/2017
Sarajevo, 19.06.2017.g.